



## Editorial

### Kum thak chibai.....

Amasan khawvel ah nat-na leh bawina kinawk kal ah kumthak 2021 eipui gal kaitu pa Pathian loipna i pia masau hi. Khawvel ah mi a tam zaw hin chu lopina dawi chiat ding i hiu. Chun, mi lian leh lopite hi i ngaisang chiat ua, amau chanau vak hi khak le nuam i sau a, a melhiat himai mai le i kisuanpi sek uh ahi. Zia guala i ngaisan teu chu a chanchin gen le ngaithak nuam i sau a, i hiatsau hilehle i ngaitha kit pei uh ahi.

**Kumtuang hinna:** Johan 5:24na Lal Jesu'n, "kuale ka thu hia, ei sawlpa ging chun kumtuang hinna a neitai, thiamlo chansak in um puantin, thina kipat pawt in hinna'n lutzaw ta'n a" atia. Zia khawvel ah ala um lai ngei ua Pathian ging a Lal Jesu thupiak zawmtute chun kumtuang hinna anei thei ngal ui ti ihiau hi. Khawvel thiamna sangtak nei leh politics ah dinmun sangtak tukte hi lopi isak tâk mai zen uh tawh, zia sang ah thupi zaw kumtuang

hinna zia khawvel i khualzin na ah i nei pat ziang thei chu lopi zaw diak ding ahi.

**Pathian cha, Christa golu-  
apitu hina:** Rome 8:14-18 leh 1 Johan 3:1-2na i sim chun Christa gingtu, Christa zal ah Pathian Thagau pui ah umte chu Pathian cha i ihui ti leh Pathian goluatu, Christa tawh golua khawm ding i hi dan teu mu thei ahi. Khawvel go thil sekit thei leh mangthai kit thei neitu hina ivak chan ahileh kipak a um mai zen tawh, kumtuang ah setalo ding bangkim si-  
amtu Pathian golua ding i vak hi ziang uh chu a lopi zaw diak hilo maw. Zia go chu Van Angelte leh Vansawlchakte haw'n a chan phak keilo uh ahi. Zia ban achun, Angel leh Vansawlchakte chu Pathian thisan ah tat le a hi puau a. Amau chu Angel leh Sawlchakte a himai ui. Ei uh Jesu Christa gingtute hi chu Pathian cha ihui ahi. I dinmun uh hi a lopi khawp mai a, ngaitua ding danle a haksahial ziang hi.

**Lallukhuk:** Khawvel ah

dinmun chungchuang leh sangpen chu Lallukhuk khuk hi ahi. Zia chu hotute leh thuneitu hina a chûnkhawm ahi. Zia gual tawhbang lallukhuk chu mi gilo ten khawvel ah akinep phak ding gual ahi puai. Ahinla, Pathian thu in “Thi tiang in ginum in um in, tichun hinna lallukhuk pe ding kahi” ti in hinna lallukhuk piak ei tiam ahi. Hinna lallukhuk bep hilo in gingtute lallukhuk khuk dingte chu a chi a tam khawp mai a, neu khat vak en hitiu.

- i) Kitaisiakte a dinga lallukhuk (1 Kor 9:25).
- ii) Thagau mangthai hawltute lallukhuk (1 Thess.2:19).
- iii) Dikna lallukhuk (II Tim. 4:8).
- iv) Hinna lallukhuk (Jakob 1:12).
- v) Lopina lallukhuk (I Pet. 5:4).
- vi) Sana lallukhuk (Thupuan 4:4; 14:14).

Zia lallukhuk aki gente hi mi pakhat changkim khel lo mai-thei ahi, himaleh, hinna lallukhuk hi chu gingtu hukdam ah um mitin in dawng chiat ding ahiu. Chun, Pathian in “Mitin a thilhi dungzui chiat ua piak ding kipakman” ala tiam nalai ahi.

Zia hi phatakcha ngaitua

in gingtute chu kumtuang lopina, Angelte leh Vansawlchakte sang ah dinmun sangzaw um ding ihu tina ahi. Ziaziakchun, “Christa ging ah athu zawmtute ahileh chu thiamchansak in um inau, lopina lawplut in um inau” ala ti ahi. I Johan 3:2 na lam achun, zia i lopina dingteu hi tuhin chu mit ah muthei in a kilang tadi lo bep ahi dante ei gen hi.

--o0o--

## **Thupi: Kisiik a Nunlui Paithaak.**

**Bible: Hos. 6:1-3; Mat.3:1-3; Rom 13:11-14.**

**-Rev. S.T.Kaia Vaiphei**

**T**humapui: Pathian in I phatlonah leh titlonate tamtak um maleh tutiang in I mau ei pui a, I gitlonateu ei thuk lo in ama kiang ah kilekit theina ding hunpha ei piak zia hunpha hi mang phachuam in kumlui ah I gitlonateu sim hi tiu. Kumkhat huitung ni 365 ei pui galkai in kumthak hung hi ding ahi tak tawh kitawn in tuzan a hin I kumlui gitlonah zosia paitha ding in Pathian min in ka hun chial masa ahi.

**Kumlui Hinkhua Mat Dan:**

Tu hin kumlui sung pumpi ah I hinkhuau mat dan teu nung suut kit hi tin uh; Pathian daw lo gual ah I khawsaknau, I gamtatnau zosia Lalpa kengbul in thupha chawi hi tiu. I hindan lui uh I paithaak ua, hinkhaw thak I mat lo uh ahi chun suachatna ding lampi a um pua, gitlonah lampi I zui zing uh ahi chun nikhat tei chu taksa leh thagau ah mangthai ngei ngei ding I hui. Zia hun chu a tun masang in unaute haw I gitlonah thupha chawi in sim hi tiu. Thisan ah tatlo Lazar bawn, van Kanaan tualnuam ah a lut leh, thisan suak ah ei tatte nang leh kei bang ding ah thi ding ah leitual ah lum den mai la hi tam, Unau, kipan in la; hung tho daw in Lalpan a ngak hi.

**Sim ding ah Chialna:**

Baptistu Johan thu tang kopi pen chu gitlo simna ahi. Lal Jesu chu hung ding ahi taak zia in 'La lung hein, vangam a nai tai,' ti hi ahi. Simna Baptisma Jordan lui a chun a chansak a, a takleh a leem septu Lal Jesu chu a hung ta, gapha ga lo ta phawt phuk in mei lak ah pai ding ahi, tin a gen hi. Ziagualmachun zawlnei Isai in le gamthip ah a la gen chu 'la lung hein; vangam a nai tai' ti in a tangkopi hi.

La phuaktu chun, "Hung kihei kit tan la aw mangthai sa, ngaitiam un tuni hin lal in a ko, ngaidam ding in leh silthian tho ding in, kimupi gang in la vaigei lo in. Lungsiat tak in a ko in a ngak hi, ngaipha tiam in a kona aw chu; Lungsiat tak in a ko in

a ngak hi, hepi tak in ka kiang hung in ti'n. Unaute haw, A la ngak zing hi bang dia muang la hem? La manthaina sawt tak hi malehle, nang pang lo in a kipa-kna a kim thei diak puai. Unaute haw, Hosea gen gual in, "Hung un Lalpa kiang lam in kile kit hi tiu, aman I gitlonateu leh phatlonateu ziak in eila vaw liam ta maleh ei tuam dam kit ding ahi. Taksa leh thagau ah dam la nuam em? Tu ah la hinkhua matdan a hin la lung a awi tak tak nam?"

### **Khawvel Limna:**

Zia khawvel limna pakzu chawp ah muang ah I um lai in, setan in ei kantawm inkumtuang gawtmun lua ding in ei hen det a, ei in la zia chu hepha lo in-hinkhua I nawpdan dan in I mang a, khawvel hi a zap in I zap thaw a, I hiatlo kal in I inchen khaw-sak a niam deu deu ahi. Khawvel pakzu chawpin I ne, I dawn a, I lung a awi tak tak chuam diak pua, I kipakna a kim thei chuam diak pua, La phuaktu chun, "Sang tamtakten a hawl ui lopina; mu zolo in thanmual a khum zo tau, lopina lim a hawl ui sum zing bang, mu leh changten le a

nei den thei puau" a ti ahi. Unaute haw, I lawi leh pai ngaitakten kipakna, lopina leh limna a hawl ua, mu zolo in thanmual a khum zo tau. Khawvel a hin nuam in leng maleng le mangthai ka la hi. Maleh ka Lalpa hepina lopi chu gitlo sim ah ngaidam. Lalpan zi nawl nung kokit gual in ei kokit ahi. Hosea zi chun a pawsal nusia in thanguvai tak in pawsaldang tawh hinkhua a va mang ah, a kipakna a bukim chuam pua, a pawsal kiang in a hungkit a, a pawsal chun kipak tak leh hepi tak in a la pawm kit mai ahi. Thadou la chun, Leiset lopina ka hawl lai in, Ka lung sung a konthu hin sei chun, lamvai nang hung kile tan ei ti. Ka pakai tai lo ken muanpi nei lo, ka lamvaina a kon ei hin tiam, a ti ahi. Zawlnei chun, ka miten thil pani a hi khial ui, kei hinna tuikhuk ei hemil un, ei nusia un, amau ding in tuikhuk a kisiam un maleh a tuikhuk siam ua chun tui kiting den thei lo ding chu, tin a gen hi. Unaute haw, kipakna ding leh lungawina ding I del teu hi Lal Jesu pang lo in thina lam a la hi. Kipakna kim, lungawina kim ei pe thei puai.

**Chapa Taimangpa:**

I hiat chiat sa gual in chapa taimang pa chun a u pa gochan ding le a la khawm a, sum tamtak chu kipuak in gam gamla tak in a chia ta, sum a nei lai sia chun a lawi leh paai ding a tam a, min a lungsiat a, a ngainau a, khawvel limna zu leh sa, nawp-chenna dang dang in a kibual a, hunsawt deu nung in a sum a hung bei ta, lawi leh paai ding leh ngaainalungsiattu ding a nei ta puai. Kuaman la a inn un a tunsak nuam ta puau a, an nek sak ding la a nei ta puau, sum la a nei ta puau, a tawp in mi vawk an pe ding in lou lam in a chia ta, a gil a hung kial tak tak phat in vawk an baal hawng chu le a ducha ziang tai. Tai kisip hial ah a hung um phat in a hung kingaitua a, ka pa inn ah suak sumlawten nek sen loa nei tam siat uh tawh, kei la zia hin gil kiang in thi ding ka hi tan, tho ing ka tin, ka pa kiang lam zuan kit tang ka, tin thupukna a hun siam ta, thi leh thi ti in a hung kipatdawk phat in a pan gal gamla tak a pat in a hun gal mu ta, a hun del a, a chapa chu hepi tak in a chawpngawingawi

ta ahi. Hung kipan lo hen la hi leh a umna mun a chun thiden ding ahi.

Unaute haw, I nek I dawn lim in lawi leh pai ding le I hau a, sum leh pai le I hau a, I tak-san le a cho a, maleh hun hung chia in inchen khawsak in hung zawngkhaal tiat tiat hi tin, mi ngainat law lo deu deu hi tin, I taksa hung zawngkhal tiat tiat hi tin, a tawp tak leh ngawl thei ta puau hi tin, eima ei hung le nek zaw tan tin, chapa taimangpa gual ah thi leh thi thoing ka tin ka pa kiang lam zuan kit tang ka tia la kipatdw ziang lo ahi chun la umna a chun thiden tei ding la hi. Gilo in Pathian taisan maleh chun a phatna, nang a hun hepi-na a chul diak puau, ama tuk ah hun lungsiat ding dang khawvel a hin a um diak puai. Kile kin in la vaigei masang in a hun ngak zing ahi.

**Pathian Ngaidamna Thutiam:**

I gitlonau bang gualin sandup ziang leh le ama kiang ah I kile kit chun ngaidam zaw lo a nei puau, maleh dan leh la ti ahi chun hung kikhel ding ahi. II Chro. 7: 13-14, a chun ka mite a hung

kingaitawm ua, a hung pauchap ua, ka mel a hun hawl ua, a gitlonau lampi a hung kiheisan phat ua leh van a pat hun ngaithaang ka tin, a gitlonateu ngaidam in, a gamuh hi dam ding ka hi, tin a kitiam hi. Isai 55:7 a chun, mi nunsia chun a siatna lampihaisan hen la, mi diklo chun a ngaituana diklo chu haisan ta hen, Lalpa lam ah hung kile kit hen, a chung ah zangai in a, I Pathian kiang lam ah hung kilekit uh hen, aman a la ngaidam ma ma ding ahi ngal a, a ti ahi. Isai ma chun, 1:17 ah la gitlonateu chu sandup ziang maleh vuk gual in vam in a, a ti ahi. Tichun I puanteu hi lo in I thinlung puanteu bawt thekhi

tiu, ama chu mi lungsiat thiam leh jangai thiam, lungniang leh lainatna dim mi gawt ziang lo ahi (Joel 2:13).

Pathian muten a kipak ziau thu in a gen seng puau a, gam liantak ah lalpen a chut sang in Jesu nei ka nuam zawi, tin la in a la phuak uh ahi. Unau la gitlonate thupha chawi in la nunlui paitha tan, tichun kipakna kim chu mu'n la.

*Lalpan a thu malzawl ta hen,  
Amen.*

--o0o--

# Gingtute chu nasep pha lam ah masawn zel ding ahi.

Tita 3:1-2; Ikor 14:20-25

-Rev. Seilunlal Vaiphei

**M**ihing khat anu awi sung ah hungpiang, ataksa khanglianta ngai ngailo la he khau em? A hung pitin lam ah khanghatlo chu um ngei ina, a hinla apian lim gual gual um theng/den vang ihia ngai puau hi. Khen khat chu taksa khandan hawi beklo leh le a lungthim bek pitinna lam in a khangtho hi. I piantil ua kipat in pitinna lam in khangta loleu hin nawksak mama ziang mai thei ihu! a hiloleh taksa hi khangte'n henla, i lungthim uh khangthei ta mawng mawng lo leh chu mi subuai-tu mai leh mi dangte sim maw um leh thet um kiji mai lo ding ahem maw...

Gingtu hinkhua hile mihing hung piandaw guala khanglian a pitinna lam manaw zel ding akul dan tuni'n chawmchan gen kit ding ihu.

**A piang chu khanglian ding mawng ahi:** Mihing i hung piang a, i taksau leh lungthim alian lam leh a piting lam ah ahung khan gual in gingtu le pitinna lam manaw ah akhang ding ahi. Mi piangthak hingala, ginna leh pitinna lam ah a khanglo chun nausen gual hin tin, kochuam puitu leh nasemtute a ding in etkawl haksa leh buai um hin a. Khristian hinkhua hi chu *'buaipi ngai zing in a um thei puai'* ati sek ui. Buaipi ngai zing ah kikawi gingtu chu anungtawl a hi zawi. Damlo gimtak, khawvela etkawl zing ziang

ngai chu gim deudeu in kilanglo maleh dam lam kai a masawnlo chu a chau tialtial sek gual ahin, gingtu hinkhua hile pitinna lama a khanlo chun a kipuk/nungtawl tina ahi. Gingtu khat chu a ginna lam a khang zello chun a chau, piangthaklo gual-mai, Khristian hilo gual maiin a um paisek ahi. Ziaziak a chun ginna lam a khanlet akul in apawi maw ma hi.

**Gingtu masawn na:** Gingtu masawn na dan chu banggual a hi em? Pathian thu hiatna lama ma asawn a khanglian ding ahi. A Bible thu hiatna hung pungzel chu

le hiatthiamna a nei thuk tialtial ding ahi. Zia gual a chu Pathian thu hiatthiamna hung masawnte chu a nisin hinkhua a mat tam thei deudeu ding ahi.

Pathian thu hiatna apung lam ah akhan zel gual in hepi-na leh dawtheina te, thilpha hile mite a ding malzawlna hina lam inle masawn in akhan bawk ding ahi. Eima taksa dawina lampang a kisum theina lam ah khanzel hi gingtu hinkhua masawna leh pitinna lama thil pawimaw tak khat chu ahi.

Lungnat kisum theinate, mi gensiat chinlona lama masawn theinate hi gingtu hinkhua ah pitinna lam in apawimaw tak zet hi. Eima ngaidan leh dawidan khel hilo maleh hotute vaihawmna gual ah thumang taka zawp mai hi gingtute pitinna lampi pawimawtak ahi. Min ei kinakpi a, ei suk lungnat lai ale kisum ziang theinate hi gingtu piting mizia a hia. Ziate chou hilo in alampidang dang ale khanlet zel ding ahi.

**Taimatna lama pitinna:** Gingtu piting chu kawng bangkim in ataima sek hi. Zia gual chun vaihawmna lam ate, sep leh bawl-na lam ate, kikhawpna lam ate,

le khasimna lama ate, in leh akiang kimvel sukthianna lam ate, mani taksa leh vante sukthianna lam a taimat, khut nasepna lama taimatnate hi gingtute khanlet zelna lam ah thil pawimaw ahi chiat hi.

Zia ban a hin kikhawp taimatte pauchap leh Bible sim taimatte leh Khristian Labu ah La thiamna lam a masawnte hi gingtu piting zia a hi vek hi. Kochuam thugin, leh thunun dan hiatna lam leh Kochuam thununna dan hiatna lam a masawnte hi khanletna lampi a hi vek hi. Zia lamkai a hin mi piangthakte chun ma asawn zel ding ahi.

Khristian ti leh piangthak tih kibang gelgel hiding a hia, himaleh kibangin imang thei puau hi. A ziakchu '*Khristian*' minpu zing ngalin Khrista ah piang velo l um sek ziak uh ahi pen hi. Khristian ti um zia tak chu Khrista zilsakna zawmtu leh zuitu tina ahi. Zia gual mi chu Khrista ah piang ahi ngeisek ui.

**Thukhakna:** Khrista i nei nung uau hin masawn gawlo in lungawita mai leu hin, ginna lamin piting thei puaitiu. Ginna piting tena chu lam khat lam ni vel bepa genfelthei ahi puai; akilakdaw



dan lam chuam chuam a kipatin  
a hiat thei sek ahi. Pitingte chun  
an gum leh hatna lam pua haw a  
nekthei gualun ginna leh thagau  
lam hinkhua mipiting chun thutak  
avawpthei in; lim na leh mi tamna  
laka panglo inle a detdo sek hi.

Zia hinkhua chu puituten a ngai-  
san ua, mite'n hingei ding atup  
khawlaw theina ding ua zilsak  
dan thiam leu hin belamte vak  
mang nawt ta puannau.

--o0o--

# Mizo laphuaktu Patea, Suakliana leh Chawngkhupa chanchin chawmkim

**-Rev. Thanglianmang**

**T**uni hin Mizo Pathian laphuaktu khankhat chanchin a chawm thei lam in gen ding ihu. Amau haw laphuak zal in tuni tianga khangthak te a dingin thagau lam ah kisukhatna pawimaw tak ahi zing hi

## **1. Patea:**

Patea hi 1894 kum in Mizoram gamsung Tualteah khua a piang hi. A min tak chu Zaliana ahin, himaleh aneu apat taksa neu ah piang ahiziakin paneu ti ah ko ah um ziakin, zia min chu apitin tiang in a pawden ta ahi. A pa min chu Selbawnga ahin, a nu min chu Sinnawii ahi. A neu-lai ah apa'n a thisan ziakin anu uh Saithuami Lengkhua ah cheng chu ava bel ui. Hun chawmkhat zaw anu uh pawsal chu ahung thi ziakin a nuchan un khaw chuam chuam in a kipem ui. Amau kenga a din zawlo ziakun a tawp in khawbung khaw hausu Lalbika kianga a suak ding un a kipelut ui.

Zia tak mun ah chun a zi Kapnuni tawh dan thiangtho in ahung kicheng ui. March 10<sup>th</sup>, 1922 ni'n kochuam Upa ah ordain in a um hi. 1939 kum in

Burma gam ah Chin state sunga Mualjawl khua a kipem in, 1944 Japan gal in Mizoram ah Reiek khua ahung tung kit hi. A zaw in Tualteah khua atung in 1946 in Santhanga khua a kipem in zia tak mun ah chun Dt. 23<sup>rd</sup> March 1950 ni'n Lalpa kiangan a chawl tai. 1986 kum in Patea gu te chu Than apat chaw daw kit in a um in, Mizo hla kungpi mual(Mizo laphuak minthang te tang Khawbung khua) vui in a um hi. Patea hin a zi Kapnuni tawh cha pa-khua a nei hi.

Patea hi pa nel um tak, tawtbawl thiamtak, khutthiam tak, thiangtho tak ah kichei mi, tense hattak, mi lungleng theitak, Pathian thugen gunchu tak leh pauchap mi ahi. Pathian La 55 vel a phuak in, zia ala phuak-te chu Mizoram bep hilo Burma gam ah achen lai ah a phuak ahi. A laphuak dan a gendan

ah chun- Gamnuai ah ka chia in, Nadua chungaw bawkkhup in ka pauchap in, mitthi pawt pum ah lungleng tak ah ka um phat leh La thu ding chu ahung pawt zung zung hi ati ahi. ‘*Makhan Mosia’n Kanan a thil ah..*’ ti ahung phuak dan chu- Patea chu thugen ah Thekte khua a um lai tak in Kochuam Upa pakhat in Aizawl apat saptan ‘*Mosia’n kanan gam a thilna*’ lim hawitak ahun piak chu amu, alim Dai ah kitak chu a en vawng vawng ah, alim neipa kiangin , “Pu Thang, ka lung aleng na e...” ti in a thum vawng vawng hi. Tichun, Puitu Mosia’n kanan alutlona ding thil ah, Tâng ah lungleng tak ah a um ding dan chu ngaitua in, gingtute van kanan thil ding ngaitua kawm in, makhan Mosia’n kanan a thil ah.. ti La chu a phuak dawktak ahi.

***Patea La phuak khenkhat:***

- (i) *Aw Lalpa David leh a suan Aksi..*
- (ii) *Ni minthang hung tung di ei tai..*
- (iii) *Makhan Mosia’n Kanan a thil ah..*
- (iv) *Ka damlai thigua abei phat leh..*

**2. Suakliana:**

Suakliana hi Mizoram gamsung Mimte khua 1901 in a piang hi. A pa min chu Hrangkungga Sailo ahi. A neulai in amit veilam mawl in a dawt kha, amit naucha asut khak ziakin khua amu thei ta puai. Mit langkhat khawmu pum in tangval hinkhua ahung mang hi. A pa chu ginglo mi ahi ban ah zi thak ahun nei in, tichun anu leh pa chun Suakliana chu gingtu ahina ziakin le a sugenthei mamau. 1928 kum in Suakzawni tawh kochuam dan thiangtho ah kicheng ui. 1930 kum in amit changlam kai le ahung na zawm kit in, tichun amit langni in khua amu ta puai. Taksa lam ah anu leh pa sukgentheina leh a mit thumna chu a hinkhua Pathian pawlna kipatna ahung hi tai. Tichun, a hinkhua pumpi Pathian ah landawkt in thugen ah vak pan in, La ahung phuak in 150 zet ahung phuak hi. Tichun, July 3<sup>rd</sup> 1979 ni’n Lianpui khua in Lalpa kiangin a chawl tai. A laphuak te hi Pathian pakna La, chawihawina La leh vangam ngaina La te ahi. ‘*Ka ngakzing ui van lal cha*’ ti a phuakdan chu - Lou tho dinga anu leh pa tawh a chiau in, Suakliana mitthum chun hampa

tawh bu hekhen thei dukdak lo in bu khenkhat chu a bawt tha kha sek ah, anu chun nasatak in agai ta, Suakliana chu le genthei kisa ta lua'n, taimang ah kitha mai le a nuam in, guam lam in atai ta. A malam in gawpi nasatak in a dawn kit in, ama chun anung in a delzui ah, zia lai tak ah genthei ah Pathian a kona chun Pathian hepina La ahung phuak ta ahi. Pathian in ama sanga genthei zaw Calcutta khawpi ah khut-dawte amu sak in, chuleh van Angel simsenlo Pathian pakna La sate amu sak in, amau haw tawh la sakhawm in '*ka ngak zing ui van lal cha*'..ti chu a phuak dawk ta ahi.

**Suakliana la phuak khenkhat te-**

- (i) *Aw hukdampa gitlo lungzinna kal ahin..*
- (ii) *Min dang zosia sangin..*
- (iii) *Jerusalem Zion khawpi chu thiltiam un..*
- (iv) *Ka ngal zing ui van al chap..*

**3. Chawngkhupa:**

Chawngkhupa hi April 9<sup>th</sup>, 1904 ni'n Mizoram gam-sung Sailam khua in a piang hi. A min tak chu Lalchawngkhupa ahi. A pa min chu Kawldingpuia. Chawngkhupa hi a unau lak ua

aneu lam ahi, ama hi aneu apat piandan ah taksa bukim beklo ahi ban ah mi dang-awk le ahi kit hi. 1914 kum in khristian ahung hi'n ti chun Pathian ah hung kiman-go in 1917 kum apat in Pathian apat kilakna ahung mu pan hi. Mizoram gam um ding dan amu te haw chu gen in muntin in a vak hi. Pathian thagau ah limna nasatak nei in thupuan tamtak anei sek hi. A thagau chan in a kaihuai dan ah akhawsak dan te haw chu khawvel vaihawmtuten ahia-thiamlo ziak un suangkul tianga khum in a um hi.

Ama hindan chu ganchate zosia a lungsiat in tha ding chu a phal him him puai. Savom mi kap liamsa amu chule phatak in a enkawl dam hi. Gulgu nei bang a ngawng in a awk in gul inle bangma a law puai. Ama ganchate zosia a dingin a gualpha ahi. Eden huan ah Evi leh Adam gual a khan Pathian thilsiam ganchate tawh lawikhat ah um atup ahi. A insung mite tawh in ah um manlo in a ngawng ah khuang awk pum in Mizoram gam dung leh vai fang in ahunte amang hi. A bial fanpi sek Upa Hmingthanga(electric veng ah cheng) in Chawngkhupa hindan a genna

ah chun- Chawngkhupa hindan danglam tak hi khawvel mite hi-atzaw ding gual ei puai, Pathian bep in a hiai ati ahi. Tichun hun chiato zel in 24<sup>th</sup> June 1990 ni'n Lalpa kiangah chawl di'n a lei hinkhua a bei tai. A luang damsachu Selesih farm veng, Durtlang ah vuiliam ahi.

A La phuak tuni chan ah kisa chimlo chu "Aw ei hepi Pathian in.." ti La kha ahi. Zia La hi 1936 kum ah Aizawl Jail ah a umlai ah Jail sunga a phuak ahi. Khawvel miten a hindan a hiatthiamlo na thu La ah apfuak ahi.

--o0o--

# SOCIAL MEDIA LEH KHRISTIAN KHANGLAI TE

**-Rev. D. Robert Thanga  
Tamilnadu Theological Seminay  
Madurai, Tamilnadu**

**Philipi 1:27;** Banghitalah, la umdan uh chu Khrista chanchinpha tawh kituak sakphawt tau in...

**1. Technology-in professional thil mitin kiang pia:** Media thil hi mi bik(Unique), journalist lam nasem na ding biik a kawina aum sek a, ahin ziahun chun hung kitheng a, *WhatsApp: hi kum 10 chiata January 2010 in hung um pan ah, February 2020 in WhatsApp mangtu 2 billion aki um ta ahi. Kum 16 upa Facebook hi August 2020 tha tiang ah mangtu 3.14 billion um pha ta ahi. Nang leh kei hi le publisher, broadcaster, promoter, advertise ihung hi thei ta ahi. Media ethics, professional journalist te cho hiat leh mat ding ah in ngai sek uh kha, nang leh kei khut ahung um ta mai a, ziahun khawvel um danchu hung theng dang lam ahi. Zia khawvel ah i um takziak un, Khanglai te apha lam a mat ding dan ikizil til uh angai ta ahi.*

**2. Do lo in mangpha chuam in:** Matchak leh thiamthilte hi Pathian in mihingte kiang ah a piak ahi. Do lo in mat phatchuam guat zawk ding ahi. Social media hi Khristian leh Khristian lo tenle kimang vek a, aphachuam thei pen a mat hi khristian khanglaite hi ding a kilawm ahi. phatna: Gen ngai lo in mitin hiat suakvek uh, hiatbena, hiatthiamna, ngaidan epiak be a, thil ei zilsak a, tepna ten, kawihawi nan ei pan pi hi. Zi leh Pawsal hawlna leh counseling matchak, kingak leh man tawm cha kiho tuana ahi. Khawtang, suangkuan, kochuam te kiho tua na til pha chuan tak ahi, panpi ngaite panpi na le social media hi phachuamtak ah mat sek ahi.

**Information Technology leh Social Media** hi nek hawl na leh nasepna nasatak in ei pan-

pi a. Mimal hinkhua nasep bai lam na asiam a, diary, sum mu leh matna, appointment, records, samples, designs, leh Sunday school zillaite a ding thiang in le ei panpitu pha taka hi. Ahinla, phatna tam tak um lai in, Satan in tiamtakmai in gam lakguan pan nasatak in ala zing hi. Zia pan laknate haw chu vak taklang hi tui.

**(i) Ngawlvei Natna:** A phatna a tam takluat ziak in khenkhat in ngawl pi hial in, a um lo inle a hinkhua famkimlo in a ngai ui. Social media a thusa khenkhat miten angaiven ziak un, mite hiat ahi nau chu, kiletsakpi in, chapotak in aum sek ui. Mite sang a pilzaw, genthiamzaw, hiatna hauzaw gual ah lat guan nau ziakun, a mimal hinkhu asuse sek hi. Social media hi sunggil phatna taktak um loin, paw lam kilat dan kilawmtak, kilatsak tu mai ahithe i ziak in Setan in lemchan ah lan, zia chun amang cha ahi.

**(ii) Kitimat na subua:** Thuguk gen a nawp ah, a guk cha kiho lemchan a, ngaizawng te leh nupan kal in le pha lo lam mat a bai lam a, zia chun mimal,

sungkuam, kochuam leh khawtang a subuai nasa thei ma ma ahi.

**(iii) Misiatna gen theina leh liau theina ahi:** Phone hi smart-phone hi maleh, a neitu a smart lo chun mualpho namai ahithe i hi. Thilbai lam tak hitheina hin, mi mal leh khawtang thuthe dal na te, thukipiak tuana het chian lo leh zothu thedalena, a neitu phalna lo puangzak techun sum liu theina ahi. Ziabanin, I gam vaihawm tute gensiat leh mani ngaidan gen vel vel hin thil kilawm lo thiangan leh sak aum thei ziak in khristian khanglaite a din kiven ngai ahi.

**(iv) Mihing mizia latsaktu:** Social media hi mizia lat saktu khat ahizak in, mi khenkhat kisuklopi ut aum ua, khenkhat chu mizia kisel chi aum ui. Ziazak chun, la thilzik leh thu leh la asua daw khan kua lahi em; mipi ting hi ding kilawm leh kilawm lo chu la thil tak lat apat khan hiatthei ahi. Philippi 1:27 Banghitaleh, la umdan uh chu Khrista chanchinpha tawh kituak sakphawt tau in.

**(v) La ngawn ah:** Marka 4:34 a chun Jesu khrista kha a nungzui

te taw aum phat ua leh tekhinthu pang lo in thu agensek hi, I ngawn ah um hi Khristian khanglaite a ding thagau an lakna hun ahi ziak in, ziahun hi social media khawina la pe tam em ahi loleh, la thagau an lak nan la mangzaw em! Eima mimal chiat kidawt thak apa-wi mawi.

**(vi) Limlak:** Jakob 1:23-24, Kuale thu chu ngai thangal ah sep-daw neilo techu, milim et ah ki-en gualbep a hui in; a ki-en ah, a chia mang un, bang gual a hui a kihemil kit ngal sek-gual chu a hi. I limlak, social media ah I latsak dan ahin, mi tam tak te akithem sek a. La limlak zosia model gual a laki post hin sungkuan nupen hi ding a tel ngam lo um lo ah la um khaw law thei ahi. La limlak tam zawchu picnic leh annek khawm na ahi em? La naseplai limlak mu ding aum lo chun miten ngaizawng tak-tak ah ahun tel lo maithei ahiu. Nang chu mifel tak hile chin le la limlak pi te leh amun in azil lo chun nang ma hinkhua kha la hiat lo kal in hung suse thei ahi. Zia ban in, la limlak nal ma ma hin, midang te la them

a, aban in nang le la ki them ahi. Ziakiak ah chun la limlak in buai kin, la limlak sak in, Lalpa'n la hina tak tak kha a dawi zawi.

**(vii) Pilvang in:** Sam 10:9 Sakei-baknei gual in a kiselgu, pan-pitu neilo te chu a man ah a pawmang sek hi...tigail in, social media mang cha hin Setan in ahung chang zing hi, Setan a ding ah mang di lahem ahilole Setan zawna mangzaw ding? 1Kor 15:33 "Thepzaw in um ki un, gual-phalo in umchanpha a su siai; ti ahi. Social media mang cha sual kithep zawsak kin la, mi dang te themzaw'n le pang kin.

**(viii) Khristian khanglai te pilna Media:** Thupilte 4:5 Pilna leh hiatthiam nanei in la, hemil ngai kin. Kahun hilna thute thatham ngai kin...tizik gual in. Khristian Khanglai ten pilna media suangphum chu thagau thiangotho hi ahi. Zia ziak a chun, la thinlung a thagau thiangotho thu hung ki post tekha mawk "like" mai kin. Mawk "delete"kin, ngai pawm maw inla, thagau thiangotho thugen chu zawm mai in.



# “Khawvel leh asung ah thil um zosia thangai kin.” 1Johan 2:15.

**By: Rev. Seilunlal Vaiphei.**

**Thumapui :** I umnau gam ahin mimal zalenna ti ahia, himaleh gingtute a ding ahin mihing daw dan ah hinkhua mang ah kalsu-angthei ihilo dan uh hiat akul hi. Ginglotute tawh ngawngkaw/ bat khawmpi thei ihi puau a. Chun, kinepna neite a ding in i

**Khawvel nawpnate hi thangai ki'n hung mangthai pai ding ahi:** Khawvel hoina leh nawpnate hi pakcha gual ahin, ahoina leh anawp nate hi hun chawmcha sung ding bep ahi. Hiatmanlo kal in hung mual pai zing ding ahi. Ziakiachun, khawvel hoina leh nawpnate hin damsung limna eipia theilo ding ahi zia kin gingtute'n thangai lo him ding uh ahi. Johan lekhathawt apat a imu daw thei uh chu, khawvel leh a sung ah um zosia thangai kin ati hi mihingten i daw tel thei ding uau agen hi zawlo in, thupiak ahi zawk dan hiat daw ziang thei ahi.

Hun chawmkhat sung ading bawn hoi isak ua i than-

taksa leh i thagau damna ding a chun thil bangkim chàn ngam angai kit bawk hi. Khawvel leh a sunga thil um zosia thangailo ding ti thumal gen ding tam ma leh a nuai ahin chawmkim chan khawvel i thangailo na ding zia/ uh ala enkhawm hitiu.

gai thei uh leh gal zawna ichan phat tak uleh bang gual in ahoi in anuam ta diam maw, zia chulam et zing kawm ah malam kal isuan zello uh ahi chun kipuk ngei ngei ding ihu. Pathian mu nuam leh henuam te ading in taksa lam lunggul lo phawt ah hinkhua mat ding ahi.

**Pathian chate'n khawvel nawpnate athangai chun, Pathian hepina mulo ding ahi:**

Gingtu khat hingal ah khawvel nawpnate a lunthim ngaituana a kawi zing ahi chun, Pathian apat hepina chang zawlo ding tina ahi. Luke 9:62 “kuale lou kaina langkawn tu tangal ah nungram en kit chu Pathian gam mi hitâk ahi puai, atia”. Kuale

Christa kanei tai ti tangal ah sum leh pai, nil eh go leh ama thuneina ding lam chau buaipi zing. Pathian in a ko-chuam ahina te hepha talo leh cha leh nau Pathian thu ah ziltina chang hepha talo, insung maicham leh Biakin lam zawtna chang le hetalo michu bang tin Pathian hepina chang thei ding ahem?

Khawvel ah nei nungnate, taksa nawpnate, du-amnate, diklo taka nek hawnate, than huainate, golguknate ziate laka pat saltang hinkhua mang zing leh khawsa zing mi chun Pathian hepina chu amulo ding tina ahi. Pathian lunglam hite vang chu kumtuang in hing innau: “Thudik in vaihawm unla, zangaina leh lai natna’n kikawmtua chiat unla, Meithai, nauchaga, malzin leh migentheite chu nuaisia kiu in; kuama’n la lungthim ziang unla unaute siatna ding ngaitua kiu in”(Zekariah 7:9-10). Damlai ni hun chawmcha inei sung uau hin Pathian lunglam i hawl uh ngai hi. Thil zosia siamtu Pathian ahia, thil bangkim hi ama a ahi ziakin, mihingte hi enkawltu mai mai ding ah guatte chu ahi. Enkawltu kiti chu athuneipen tina ahi pua, achung ah vaihawmtu lian zaw a

um nalai hi tina ahi.

Enkawltu ihu a, diktaka vaihawm i hawm uh angai hi. A neitupa hiatlo ah lep leh dual ah mithem ding le ihi pua, dik taka i maw puaknau chu maw i puaklo uh leh paithak ah um thei nalai ihu.

### **Thukhakna:**

Khrista nungzuitu khat ihi chun, zia khawvel nawpnate hi kei a ding ahi puai ti ngam ah nusia ziang ding dan chu ahi. Mihing siam kawm pakchate chu bang gual in hoi ziang maleh chung leng vacha leh zu leh va ten azu chawp ding in ado thei pua hi. Zia gual ma chun, Khrista neitute chun khawvel nawpnate thangai mi chu loi leh pai ding leh nekhawm dawnkhawmpi ding in alunggul thei pua.

Sawlchak Paul in Rome mite kiang ala gen, Khrista hepina ah kipat chun kuan ei khen zo ding ahem? ala ti gual hin, Chanchinpha ziaka ila thuaknateu hi i thuk mualsua zaw ahi chun tunung leh lopina ichan na ding uh ahi. Ziaziakchun, hinna dawi leh nipha mu nuamte chun, thilphalo lakin a hinkhua matdante vengpha henla, gitlona zosia nusia ngam ah thilpha abawl

ding ahi.

Nikhat mai le lockdown/  
bandh a um chun, i thilnei teu  
bangmalo mai ahi dan ihiat daw  
thei a khawvel um na tak ei puai  
tia ngaituana inei thei chun, bang  
ziaka damsung kipakna eipia  
theilo chu thangai ding ihu em?

Tulai gingtute chu wall clock bat-  
tery athak laisia aki pei vel ah  
battery ahung chau phat tak leh  
thi le thilo chatlawk lawk ziang  
himaleh masawn theilo gual hilo  
ding ahi.

--o0o--

## PAUCHAPNA HINKHUA HETCHIAN ZEL DINGA PAWIMAW TE

**-Pro Pastor Pauneithang.**

### THUPATNA

**P**auchapna hi “Jesu toh kiholim” tina ahi. Pauchapna hi doi leh ngaic-  
hat te Pathian kianga tut tou, bangkim a dan gual leh mamaw dungjui  
in, kingaitawm taka I Lalpa Jesu Khrista, I Lalpau leh hukdampa zal  
a muding a ginga, Pathian biakna ahi. Pauchapna hi Pathian biak-  
na, Pa Pathian kianga ki dawn, Jesu Khrista mina, Thagau Thiangtho  
thilhitheina ah ahi. Pauchapna hi mihing thagau toh Pathian kiholim  
ahi. Pauchapna hi ngai taktak a kiko a Pathian kou hile ahi nai, ahin  
Pauchapna taktak chu I kam in a gen sanga, la ngaituana la lungsung,  
la thagau in a gen kha Pathianin a la ngaitha zaw ahi. Midik tak  
pauchapna chun khawvel pumpi a chokling zou ahi. Pauchapna toh  
kisai a hetchian zel ding poimaw te a ban ban in en hitiu.

**1. Khoitak a pauchap sek ding  
ahem?**

***Muntin a pauchap thei ahi. “...  
muntin in pawsalte chun, khut thi-  
antho jak in, lungna lo leh kinial lo  
in pauchap leu ka dawi..” 1Timo-***

***thy 2:8.***

Muntin a pauchap thei I hi dan  
I Bible in ei gen ahi. Nidanglai  
a chun, Samari mite chu Gerazim  
tangin a pauchap sek ua, Pathi-  
an biakna mun a anei uh ahi. Ju-

date chu Jerusalem a Pathian a biau ahi. Daniel leh a loite kha le, suak leh sal a Babulon gam lama puimang himaleu, Daniel in Jerusalem lam khel nga in, Tukvel hawngin a pauchap sek ahi. Ahin Johan 4:21-24 na Jesu'n Samari numei kiangin Gerazim tang leh Jerusalem khel lou a le Pathian biak thei ding ahi a puangdawk ahi. Aziakchu, Jesu'n Kross a ahepina thisan in I sual na man a piak ziak ahi. Zia Jesu hinna Thisan chun Jerusalem temple sung a kidaidanna puanjak akim in ahung thek ta ahi. Zia chun, mizosia Jesu thisan jala Thiampu hina ah, Pathian toh kihotheina akinei ta ahi. Jesu thisan zalin Pathian toh kizawp in ium tau ahi. Jesu thisan zal a chun mun thi-anthopena lut ngamna I nei tau ahi. Jesu thisan jal a chun muntin a pauchap theina zalenna inei tau ahi. Ahin mihing mel leh puam kibanglou ihi dungjui in, lungthim le a kibang pua. Pauchap dan amun, ahun a lunglut dan chuam chiat aki nei ahi. Pauchap dan tang pi te chu:

**i) Mimal (Private) pauchapna:** Mimal pauchapna hi a guk a pauchapna ahi deu ahi. Mizosia kiana gen theilo te, Pathian ki-

ang chou a gen thei te haw giltak a dawtna te leh Pathian toh pauchapna kipawl na giltak a hun mang tina ahi. Sawt tak le ahithei ahi.

**ii) Inkuan pauchapna:** Zia hi insung kuan ahiloleh mi tawmcha kipun khawm bang ahisek hi. Inkuan kikhopna hi ka gel pawimaw mamau khat chu ahi, keu inkuan inle. Nitaksin in ka nei tangpi sek uh ahi, emergency thil a neilo ni um thei chu ahi. Inkuan pauchapna hi insung kipumkhatna le ahi.

**iii) Mipi kikhopna a pauchap khawm:** Zia hi akikhawm a biakin kai zosian akibawl sek ahi. A thagaumipen leh a thagaumi loupem inle, Pathian chate zosia kigual taka pauchap khawmna chu ahi. Ziahin, Pathianin pauchapna a gel pawimaw dan mizosia a dinga ahi ti etsakna in le pomthei in ka hiai.

## **2. Bangtik hun a pauchap ding ahem?**

Hun zosia, bangtik lai a le pauchap zing thei leh pauchap ding ahi.

1Thessalonite 5:17 na chun, "Chawl lo in pauchap un" ati ahi. TB Joshua, Pathian in khawvel

pumpi sukdamna thilhitheina maktak mai a amat in a genna a chun, a pauchapna hun a sawt deu deu a, a tawp a chun, hun zosia a pauchap thei ta in a gen ahi. A thugen lai in le, a lungsung lama pauchap zing in a gen ahi. Zia vang chu thil haksatak hiding ahi. Pauchap hun hile, l lunglut hun a kibang pua, khenkhat chu zingkal matak a devotion ate lunglut a uma, khenkhat chu zansawtnung a mitthi tawh pauchap ngut ngut ziang le a um ahi. Bangtik hun hijiang lehle pauchapna hi a pawimaw mama jiang ahi. Ei ma mimal lunglut na hun a panlak zel a, Lalpa toh kipawl na gil zaw sem tup ding ahi. Lunglut lou in le, kihabawl a panlak ngai ahi pauchapna loting na dingin. A phapen dinga chun, Bible simna tawh pauchapna a chiakhawm thei laisia chu pauchapna Pathian lunglam gual ahisek hi. Daniel chu nisin a thumvel a biktakin a pauchap zing sek ahi. Sua-pi dawitak, Pathianin nang le pauchapna pan la lak ding chu a lung kipakna lam ahi. Pathianin la pauchapna hinkhua thil lopitak a bawl thei ahi ti hezing in.

### **3. Bang gual a pauchap ding ahem?**

#### ***i) I pauchapna Thagau Thiangtho in ma a pui ngei ding a pawimaw ahi.***

Piangthak zosia Pathian Thagau Thiangtho l sung ua hin a cheng ahi. Pathian chate hinkho diktak mang mi chun, Thagau Thiangtho puihuaina chiantakin a he thei ahi. Hinkho diktak mangzoulo kisa ihi chun, kisiam thak a pawimaw ahi. Chun, Thagau Thiangtho puihuai a pauchap theina dingin, pauchap masang leh pauchap zaw in, bible sim zing ding ahi.

Pawsal khat zi ding dawn in a pauchap a, “Lalpa nangman ka zi ding pha lasakpen pen ei pian, Kimboi” ti’n a pauchap ahi. Pathian phasakpen ti ngal a, Pathian vak hil kom ngala amin “Kimboi” vak gen malam ahi. Kimboi a doi leh Kimboi dawn mai hen la, Pathian phasakpen atileh Pathian phasak pen in dawn mai le dikzaw ding ahi. Ahi Pathian Thagau Thiangtho kipuisak le hin, ki chai khial loupending ahi. Thagau Thiangtho hi ei ziltilding, ei panpi ding, ei kithuapi ding, ei thamuan ding, ei pauchap pi ding leh ei pauchap piak nalai ding a Pathianin a hun sawl ahi. Ama Thagau Thiangtho

ki makaisak hitiu, tichun Pathian lunglam taka pauchap thei ding I hiu.

“Zia gual ah chun, Thagau chun I hatlonateu ah ei panpi sek in, eimau hin bangti pauchap ding I hiu em ti I hepuau in, zia Thagau ngei chun gen daw theilo khop ah nasa zaw’n ei dot piak in a la thum sek hi. Ama, lungthim sunggil lam ensui sekpa chun, Thagau lungthim leh ngaituate chu a hia’n, ziaziakchun, Pathian lung lam tawh kituak in mithiangthote a dingin a dot piak zing ahi.” Romte 8:26,27.

**ii. *Gunchu (persistence) taka pauchap ding ahi.***

Pathianin ama gunchu taka hawlte (pauchapte) kiangin kipakman a pesek ahi. Nu le Pa’n le a chate thabei taka umte chungin a kipak puau hi. Thabei chu fellou tina ahi. Mifellou chu a nasepna gunchu a um ngai puau. Nu le Pa te gual in Pathian inle a chate thabei, fellou leh gunchuna neilou chungin a kipak lou ding ahi. Pathianin a mi Israelte bawngnou lim(idol) a hou ziak ua, lungna mama in sukmangthai a gaw ta ahi. Ziachu Mosi’n a het phatin, anggawlin ni sawmli leh zan sawmli hial Sinai tang chun-

ga a pauchapin, Pathian kiangin Israelte a dingin ngaidam a dawtpiaka, Pathianin a ngaidam ahi. Mosi pauchapna ziak hiloleh, tu Israel khi umlou ding tina ahi. Suapite, nang leh kei inle Pathian biakna leh pauchapna hi I ngainep thei hun chu ahitalou ahi. Pauchapna pan lathak dingin iki chial ahi.

**iii. *Kingaitawm taka Pathian kiang pauchap ding ahi.***

Lui chu tang chung apat, tang nuailam a niam lamlam a a luang gualin, Pathian le mi kingaitawm te kiang lam lam in a um sek ahi. Pharisai leh Sedawlpa pauchapna kha vak en leu hin: Pharisai pa pauchapna ahileh, nekguk chinglo, diktat ahizia te, leh Sedawlpa gual ahilou dan te genin a pauchap ahi. Sedawlpa pauchap na chu, sual hi kihechian ma ma in, kisikin aum a, vanlam le enngam lou in, “kei migilo kahi, ka chung a jangai in” ti’n a pauchap ahi. Tichun, Bible a imu gual un, a kingaitawm Sedawlpa chu thiamchang ah um in a in lam in a chia suk tai, akiti ahi.

“Ka min pu ka mipite a hung kingaitawm ua, a hung pauchap ua, ka mel a hun hawl ua, a nun siatnau lampi a hun kiheisan phat ua

leh, van a kipat hun ngaitha'ng ka tin, a gitlonateu ngaidam in, a gam uh hi'dam kit ding ka hi." 2Khangthu 7:14.

#### **4. Pauchapna doudal thei thil te** **i) Taksanzolona, ginglel na te**

Pathainin I hina toh ki-phutawk ahe, ei kipia zat ginna nei zou ding in pan lai tiu. I ginglel zaw chana Pathian lopina muding akihi ahi. Ginna'n tuipisan le suktan ahi. Ginna'n Samson in Sabiltung khagu-keu khatin, mi sangkhat a that zou ahi. Ginna'n meithainu chapa thi ta chu, Elijah pauchap in Pathian kianga a thagau hungsawl kitdingin a dawna, Pathianin Elijah ka thawm chu ahe, naupangpa thagau chu a sawlkit a, ahung hing kit ta ahi. Tichun, a pianna nu a pe kit ta ahi. Suapite, ginna hatna ding in le a pawimaw chu pauchapna hi ahi.

#### **ii) Ngaidam theilo na te**

Gingtute hi Jesu enton ding aki hi ahi, ngaidamna I nei ding uh ahi. Midang kua le ngaidam a haksa pua, ahinla, I siatna ding leh natna ding he sasa ei bawlpiak tute ngaidam ding chu thil haksa tak ahi. Ahin, ngaidam theilo keiding mite hawle, I Lalpa Jesu zal beka

ngaidam ding ahi. Ngaidam lou neizing mi chu, Pauchapna hattak umtheilou ahi. Ngaidam theina ding in le pauchapna a pawimaw ahi. Pathian Thagau Thiangtho panpina zala neithe ahi.

"Chuleh, pauchap ding ah la din tak ua leh, mi ngaidam ding la nei ua leh ngaidam phot un; zia tak chuleh la Pau van ah um chun nang uh hi khial na le ngaidam ding ahi." Marka 11:25.

#### **iii) Phatlouna/Sualna ngaituana nei zing**

Thilphalou ngaitua zing kom a Pathian kinai theilou ahi. Ziaziakchun, phatlouna zosia nusia in, paithak ngaite paitha in, Pathian zangaina Lalchutpha lam chu nga'n I pauchap ding ahi. "Ka lunggil ah thil phalo ka ngaitua zing chun, LALPA'n ei ngaitha pua'n a." Sam 66:18.

#### **5. Pathianin pauchapna a san dan:**

Pathianin pauchapna dawnhu na pathum in a sang sek ahi:-

- i. I (yes) atia, pauchapna a dawnhu a alloting sak jiang sek ahi.
- ii. Phallou (no), pauchap tute a dinga a phalou le hina, phal-

lou ziak ama bep in a het le hina, lem atilou ziang sek ahi.

iii. “Ala khongai in,” tia a dawnhun sek ahi. A hun tung nailou ahiziak le hintin, ahiloleh pauchapna hapan zosem dinga ei dawi le ahithei ahi. A nangtu thil um le ahithei ahi, pauchapna in zo angai ahi. Chuleh, ama Pathian toh kinai zosem a kipawl theina ding le ahi.

Thuthung thak a chung chung uang diaka Pathianin a matchak Sawlchak Paul pauchapna leh Pathian dawnhuna 2Korinth 12:7-9 hin, thagau lama piting tak ahidan muthei leh hiatthei ahi. Paul in a taksa chung a ‘ling’ ati chu lakdaw ahina dingin thumvei hial a dawna a pauchap lai in, Pathianin a phalpiak lou ahi, “ka hepina nang a di’n a hun ahi, ka thilhitheina hi hatlouna sukbum ah um sek ahi,” ti’n a dawn hu ahi. Paul titak zet a thumvei a pauchapna hi, I ngai tua ahichun, a khatvei pauchap hi dakkal khat, dakkalni vel chu hilou ding ahi. Ni bangjat anngawl a pauchap ei diam, kati ahi. Zia chule thumvei hial hinalai ahi. A dawnhuna chu phallou ahi nalai ahi. Pauchapna loting a

dawnhuna muchet ziaka thagau lama Paul piting zosem a hiding chu Pathian lunglam ahizaw hiding ahi.

Tuchung US Presidential election na a, Donald Trump kaikit na dinga keile thei kham kham in ka pauchap a anngawlin. Bialtu Pastor nunjui ahiziakin, program umlou kal kal in nini nivei, nikhat khavei akigom a ninga(5days) chu Jesu Khrista min in Donald Trump adingin anngawl pauchapna kanei a, a pauchapna lam chu kanei tawm mama in ka hiai, taksa a chau zia kin. Taksa I chanau le hisamlou ahia chu mitthi luangin pauchapna ka mang thei a, a vote nivei a sim lai uh kha ahia, ka pauchap zan a zinga, pauchap ziak dingin ka gingchai, tinglou maleh, ni sawmlenga(15days) result puan taktak na ding a hung chon kit ua. Pauchapna kidel zom le chu bang ati diam, akidel zom zoulou ma chu ahi ta. A khatzokpa a hung ting ta ahi. Anngawl hial a election a dinga ka pauchap pat na ahi. Tha le zung kisenga pauchap na chun, puaknat le aum ahi. A langlampa va muda ding tina chu ei puai. Chuleh, ni tamtak anngawl hial a pauchapna



le lawsam thei akihi ahi. Pathian chung a lungnat ahem, lungaw-ilouna lungthim nei lou ding hi a pawimaw ahi. Losapna chung a melma panmun a hung lua kha-kding hi veng ngai ahi l lungthim sung. Hiatdinga pawimaw khat chu, losapna sang in, lotingna leh malsawmna chungin, kiveng-phatlou ahichun Pathian lamapat gamlat hi bailam zaw mama ahi. Mihing hinkhua, lamsuk lamtou, gonuai dainuai hileh Jesu toh kiton zingding, pauchapna galhat hiding tup zel dingin pan laitiu.

### **Thutawpna**

Pauchap bang ahem tite, khoimun a pauchap ding ahem tite, bangtik hun a pauchap ding ahem tite, pauchapna dal tute,

leh pauchap pawimaw dante l he tau ahi. Chuleh, pauchapna le lunggil zosia pia panlakna te le, Pathianin lem atilo ziaka losam thei nalai akihi dan l he tau ahi. Khawvel a kicheng nalai ahiz-iakin a ziak kihesuak thei nailou chu ahi. Vangam tung phat leh chu bangkim Pathianin ei hetsuak sak ding ahi. Suapite, pauchap thilhithei dan leh poimaw dan Khristian hinkhua a dinga l hetau a, a thu sim a hiat bep hilou dingin, pauchap pan ta dingin l ki chial uh ahi. Pathianin l pauchapna hinkhua thil lopitak abawl nuam ahi ti hezing in pan la zel hitiu. Simtute, Pathianin malsawm ta hen. Amen.

--o0o--

## NGAIDAMNA

-Miss Chinnu, Salem Veng

**T**uni hun ah Damna aw mangcha holim thei ding a damna ei petu Pathian kiang in kipak thu ka gen ahi.

Keima chanchin chawmcha vak gen leng- KSP Office ah 1991 March apat in tâwmtak mai leh tinglo tak in ka sem pan ah. Kochuam tin ah Nu leh pate lei pauchap piak nateu ziaka sepna mualsua thei in ka um ah. Pathian leh kochuam tin te chung in kipakpina thu ka puang ahi. Lalpa'n Kochuam tin te malzawl ta hen.

Gingtute lampi: **Lei Kanan – Van Kanan**

1. Kanan gam bawngnawi leh khuazu luanna gam tun na ding in lam kal ah melma gam tamtak paltheng ding aum hi.
2. Melmate ziaka buaiden /kitangden ding in Pathian in ei ti puai.
3. Melmate en lo ah a gam lampi ei zinsaktu Pathian lam en in melmate gam chu l pal theng ding ahi.
4. Leichung leh van khopi tiang a dinga melma zosia paukam hoipen leh gilpen chu cross chung, Jesu'n "Hepa amau hi ngaidam in a thilhi'u ahelou uh ahi" tih ahi.
5. Ngaidamna panglo ah melma zawthei ahilo ziak in, melma zawna ding in ngaidam na thu hi zai lan vak âwi hitiu...

*Ngaidam nan khawvel a salvak hi*

*Ngaidam nan khovel a siampha'i;*

*Ahi danglam thei hi*

*Ngaidam na mit a suvak thei hi.*

*Aw ngaidam na la mel ahoi na e...*

*Aw ngaidamna la gim a tui na e...*

*Aw ngaidamna la lopi ngei mai hi*

*Tu leh kumtuang tianga lopina*

*Neitu Lal Jesu la paukam ngaidamna hin ka thinlai ei zen hi.*

*Pathian leh mihing te kikal ah Ngaidam na paukam gil tak hin KSP gam sung jel suak hen la, Lalpa leh Khrista gam dindawna Matchak hoi pen hung chang ta hen.*

*Lalpa'n simtu malzawl taken.*

---

## PATHIAN THAGAU PUI AH UM

-Nu Neilalkim, Salem Veng

**Johan 16:13** Bang hilehle ama Thagau thutak chu a hung tun tak leh thutak zosia'n hun pui lut intin, ama phuak kawm in thu gen pua'n tin, a het tapote chu gen in tin, thil hung tung dingte chu hun hiatsak in a.  
**Rome 8:14** Pathian thagau pui ah um tapote chu Pathian chate ahi ngal un.

### THAGAU PAWLNA:

1. Bible tawh aki tuak ding ahi.

Gingtute ading thutak Pathian aw hetna leh Pathian doйдante hetna leh dik leh diklo tena hoipen chu Bible hi ahia, Thagau pawlna I chante hi Bible tawh aki tuak ding ahi.

2. Thagau pawlna chan hi vangam lutna ahi ziang puai, a ziak chu sual hiam ki he dawк kei lo ah le Thagau pawlna, sukdam thei te le nei thei ahi.

3. Thagau pawlna I chan ziak in I piangthak tai tina ahi ziang thei pua. Pathian cha hina le ahi diak puai. Thagau pawlna I chan hi Ama tawh kizawp na nei na ding ah ei pawl sek na ahi zawi.

### THAGAU PUI

1. Pathian thagau pui ah um te chu Pathian chate ahiu. Thagau pawlna achangb ua, zia Thagau puina zal achun gilo hi ki het chian na'n apui in zia chun pianthak na hung um thei bep ahi ziak in. Piangthak lo in Pathian cha ahi thei puai.

2. Thagau changsang kiti te hi Thagau pui ah um theilo te ahiu. Zia gual mite hin he aki sau in pil aki sa ta lua sek ui. Ahinla, Lal Jesun Pharisai te kiang in, "Mitthum hileu chun gitlona neilo ding la hiu a; ahin, 'Ka muthei nai' la ti ziak un, la gitlo nau ah um zing la hiu hi." tin agen hi (Johan 9:41)

3. Thagau pui ah um hi alim um pua, a nawp na lam ei puai. A ziak chu I melma te hepi ding eiti zing lai in tisa doйдan achu phuba lak utna lam ahi sek hi. Tisa doйдan ah ngaidam lo ding ati zing lai in

Thagau chun ngaidam in ei ti sek ahi.

4. Pathian thagau pui a um chu, athu gual ah um um ding Tisa doidan ah um lo ding ahi.

*Lalpan malsawm ta hen.*

--o0o--

## **PAUCHAPNA CHAWM**

**-Miss Chinnu, Salem Veng**

1. Aw Lalpa khoimun in um jiang leng le, la lam ah pang zing thei ding in ei hip in la, Hatna lei piak te hi la dawigual nasepna pha tawh ei jawp mat zing inla, Ka lam in pang zing in. Nangma lo in ding khawsuak zou lou ding ka hi ngala, la ngawngkawl ei batsak zing inla, ei kaibat in ka lawtinna zosia ahin la min chawisan na chang ta hen, ka kipak hi. Amen
2. Pathian angsung duthusam kim na gam zuan ah chia ka hin Ka umna, ka khawsakna gam vang dawicheng kimlona gam ahi. Maleh ka tun na ding chu duthusam kim na gam ahi ziakin; Zia gam tung ngei ngei ding a chun Ka lalpa'n ei ngai hi. Aw Lalpa la mel in lungdamna kim a um hi ti ei musak zing inla, Nangma zal ah la bukimna chu ka chan theina ding in. Amen.
3. Aw Pathian la dikna thu gen hi ka damsung lapi hi hen la, la vai-hawm na hi ka lamzan na hi hen la, la thupiak hi ka malsawm dawn na hi hen la, la thuthung hi ka kulpi sang hi taken. La thutiam hi kaki phudet na hi ta hen. La angsung ka chawldam na ahi ngal ah chuleh leilung luana dinga lei piak hi Siloam dil chawkphuan na mun hun chansak in

Aw Lalpa chitna, thiamna neilo la sialaw tawmtak mai hi la lopina lal chutpha ah chu dinga la dawitelna ka chan tak ziak in la min lopi chawihawi in la kiang in kipak thu ka hun gen hi. La lopi-na lalchutpha ah chu ding in mipil leh mithiam la dawitel diak pua, Nangma hun ngaina taphawt chu la dawitel na la chansak ziak in kipak thu ka hun gen hi. Ahi ka Pathian, ka pa thiango leh diktak

damsung hun chawmcha mat dinga lei piak hunsung ahin la melphat zia musing ding leh la dawigual bawl zing thei ding in lakhut in ei vawp thiangtho in. Setan thang a ka ok lo na din la melvak in ei salvak jing henla. Mosia mangcha la mi Israel te la puihuai thei na thuguk ei jilsak in. Amen

--o0o--

## **THU LAK KHAWM**

**-Miss Chinnu, Salem Veng**

1. Lawtin na chu Lalpa kipat ahi.
2. Sep lamjan nale Lalpa kipat ahi.
3. Sep thatnawp nale Lalpa a kipat ahi.
4. Ginum taka nasep hi Lalpa laka chanvo phapen phapen I chan na ahi.
5. Khosa-ul hi Malsawm na ahin mitthi hi kisil thiang na ahi.
6. Pathian thu hi nek hawlna ahi pua nek muna ahi zawi.
7. Pathian thu hi musit nahilo in choisan na ahi zawi.
8. Pathian thu hi hausakna hilo in kitodel na ahi.
9. Pathian thu hi mi a dinga lim-lang hilo in ei ma ah dinga lim-etna ahi.
10. Mihingte a ding in Khothim hun leh khovak hun a um ah Pathian a ding in zan le sun gual in a vak hi.
11. La Khualzin na gam hi zilthak kit in la.
12. Hepitu Pathian su lunggim tu hi khan la.
13. La chungga Pathian akipak na em ti hiat chian guan la, Pathian apat duatlai cha la hi ti hemil kin.
14. Pathian kinepna mi la hi ti le ki hemil kin la, Hepitu Pathian ading in kisathei him him kin.
15. Lalpa la Pathian chu mathematics ahi ti hezing in.
16. Zalenna hun la mat laisia hun kipak um mang ka hi ti ki hemil kin.
17. Khawvel ah thilpha lutpi ding leh pawtpi ding ngaitua takluat na ziak in van kotkhak ah kithawl lo ahi.

**Central Khristian Khanglai Pawl**  
Khuga Sadar Presbytery  
**THE 54<sup>TH</sup> & 6<sup>TH</sup> BIENNIAL CONFERENCE**  
Amun-Kangvai P.C  
Ahun-23rd January 2021  
Thupi- “Lithuk lam in la len sep in” -Luka5:4

**REPORT CHAWMKIM**

**1. Office Bearers:**

- Leader : Rev. Seilunlal Vaiphei
- Asst. Leader: Pu PD Minlal
- Secretary : Pu Ginthiansiam
- Asst. Secretary: Pu Lianboi
- Finance Secy+Treasurer: Nk. Chongneu
- Coordinator: Pro. Pastor Pauneithang.

2. Tukum khawmpi hi i hiat taksau gual in, i khawvel dinmun in a zillo ziakin kumdang gual in i mang thei ta pua, da um i sa mama hi. Ziaziakchun, khawmpi te taksa leh thagau kipawl khawpna um talo in, vaihawmna bep in nikhat bep mat ahi tak ziakin report le tamlo cha ka hung piak ahi tai.

3. Vaihawmna pang thei di te:

- (i) Unit- Office Bearers
- (ii) District- Office Bearers
- (iii) CKKP- Committee members & Ex.Officio
- (iv) PWF(KSP)- Office Bearers

4. **Session 1na** - Khawmpi Vaihawm hawmna

by Upa Tinkholam, Moderator KSP

**Session 2na** - Election, 2021-2023'

by Commissioner-Office Bearers KSP

**Session 3na** - Vaihawmna

by Leader/Secretary

**Session 4na** - Kikhutsanna leh Puitu thakte malzawl dawtpiakna

by Rev. S.T.Kaia Vaiphei, i/c CKKP(KSP)

5. Vaihawmna Resl.No. khenkhatte-  
-CKKP 56<sup>th</sup> & 7<sup>th</sup> Biennial Conference hi Town District ah kinga ding ahi.  
-Thupi dingin “Lalpa mattak” -2Tim.2:21.  
- Central fund hi ‘Household’ hitalo in ‘Perhead’ ah ₹. 200/- hi ta ding ahi.

6. Puitu thak te: 2021-2023

**Office Bearers**

- Leader : Pro. Pastor Pauneithang  
-Ast. Leader: Pu Lianboi  
-Secretary : Tv L. Sanglian  
-Ast. Secretary: Tv. Sonmuan  
-Finance Secy: Pu PD Minlal  
-Treasurer : Nk. N. Remi  
-Coordinator: Pu Thangzuankhawm.

Committee members:

- (i) T.Upa Ginthiansiam, (ii) Pu Lamminlun  
(iii) Pu Ginlienmang, (iv) Tv. Chinlunthang  
(v) Pu Jire Tinminlian, (vi) Tv. Paukhanmang,  
(vii) Tv. Lunbiakmuan, (viii) Tv. Lalthianmung,  
(ix) Pu Soson, (x) Tv. Lamboithang.

7. District tin Secretary apat leh CKKP Secretary apat reports mu leh ngaithak ahi.

8. Annual Audited statement etkhawm ahin apha leh dik ah pawm ahi.

*Reports chawmkim tak mai ah ka hung piak thei chu zia cheng hi ahi ta'n, Lalpa'n khawmpi kit phat leh zia sanga thupi zaw report peth-ei dingin imau ei pui chiat ta hen.*

Lalgam ah la seppiu

Sd/-  
(L.SANGLIAN)  
Secretary, CKKP (KSP)

# BIAKNA THIANGTHO

Isai 6:1-3; Thugentu 5:1

BY REV. SIAMA PHALTUAL

**B**iakna Thiangtho tihin biakna dik ahilo leh biakna hing tina lam a kawk hi. Paul in Rome mite kiang ah kithawina hing leh pawm tâk ati kha tawh a kizui ma ma hi. Gingtuten Pathian I biaknau chu biakna Thiangtho leh Pathian pawm ahi ding chu ahi. Biakna hi mun chuam chuam in le a bawlthei hi. Biak in ah kikhawm in i chiau a Pathian biakna i nei sek un, chuleh khenkhatte'n inkuan ah biakna i nei sek ui. Biakna him him i nei phat ua le Pathian kipakna ahi ding chu a pawimaw ahi. Biak in ah vachia ah kikhawpna ah vapang mai ah chun Pathian mu ah biakna Thiangtho ahilo thei ahi.

**Biakna Thiangtho a pawimaw-na ziaik:** Biakna chu i nei phawt ahileh pha mai ziang hilo ahem, tia ngaitua thei ahi. Himaleh, I biak uh Pathian chu Pathian Thiangtho ahi hi hiatmillo ding ahi. Zawlnei Isai kiang ah kilakna chun, "Lalpa chu lalchutpha kichu, sangtak leh liantak ka mu'n, a kivanna puansil mawngte chun temple sung a luadim hial a. A chunglam ah vansawlchakten a ching ua, tha paguk chiat a nei ui. Tha Pani chiat in a Mai a lia piak un, Pani chiat in a keng a tuam piak un, Pani chiat ah chun a leng chiat ui. Zia gual hin kidawngtua in a Kiko ua: 'Sepai hawnte Lalpa chu; A thiangtho hi, A thiangtho hi, A thiangtho hi; A lopina'n lei pumpi a lua dim hi,' ti

in"(Isai 6:1-3). Chun Lalpan, "Ia Thiangtho diu ahi, kei Lalpa la Pathian uh hi ka thiangtho ngal a", (Lev. 11:44) ati ahi. Thiangthona hi Pathian mizia khat ahin ama betu dingte chu Ama Thiangtho gual ah a Thiangtho diu ahi. Pathian mizia thiangthona ah i kizem ua chun i biaknau chule pawmtâk ahi ding ahi. Zia dinga chun tamlocha vak en khawm hitiu.

**Diktatna hinkhua mangmi I hi ding ug ahi:** Nisin ah hinkhua i matnau ahin diktatna hi i matsualo ding uh ahi. Gingtu hinkhua le diktatna hi kikhentheilo ding ahi. Diktatna hi Pathian dawigual ahi ngal a. Ahinla, zia thu ah hin gingtu tamtakte'n ginglotute tawh danglamna i nei ngai sek puau.



Nekguk chakgukna lak ah diktatna i zui ua hinkhaw thiangtho i nei diu ahi. Eima chan ding ahi phawt le tia diklo taka lawkna i mu uh chun Pathian thianthona ah kipat i gamlat zawknau ahi sek hi. Leilam lawkna hin thagau lam manna ei tutsek ahi. Chun, vaihawmna ah diktatna chu luitui luanggual ah i luangsak zing diu ahi(Amos 5:24). Kimaipha hawl tâkluat leh midangte mitmei veng tâkluat ziaka Lalpa huat zawng taka diktatna nutsia thei ahi.

Zawlnei Nathan leh Baptistu Johan gual ah khan diktatna a chungnunna ding in hansen apawimaw hi. Zawlnei Nathan khan Lal David in Uria ji Bethseba a luppi bak ah a pawsal Uria a tha piak thu a khan hangsan tak in Lal David diklona kha a vahil ngam ahi. Chun Baptistu Johan ngei in le Leng Herod in a suapipa ji a ki chenpi kha a diklo zia a vagen ngam ahi. Nisin i hinkhua'u ah diktatna hi i tukdetlo ahi chun Pathian thiangthona nusia hi ding ihu in, Thiangthona hinkhua manglo ah biakna imat ua chun biakna Thingtho hipuan-tin, zia chu Pathian ngai ah pawmtâk hilo ding ahi.

**Dawi leh Ai taksanglo mi:** Zia

thu hi khenkhat a ding ah thil nuizat um himaleh, khenkhatte a ding in gelsau a pawimaw ma ma tho hi. Kochuam ah le mi kimang ma ma ziangta, ahilo leh a khamkham ah Pathian ah hat kisa ma ma ziangta haw tiang le zia Dawi leh Ai thu hin ala kikat buak kha thei sek ui. Etsakanan, Bawngpi mang ziak ahem, ahiloleh damlo beidawna ziak a Dawi leh Ai thiamte vadawt ziang chu thil bailam ma ma ahi. Pathian in keima tilo Pathian dang a um puai ati ahi. Pathian le ho zing kawm ah Pathian dangte le taksang zing kawm ah gingtu hinkhua matlo ding ahi. Gingtu hinkhua hi pawlche tak mai ah i mat uh ahi chun Lalpan i biaknau chu ei pawm piak puan tin, i biaknau chule a kidak lam tak hikha ding ahi.

**Midangte tawh kichammi hi ding ahi:** Bible in, "Mi zosia tawh kichamna leh Thiangthona chu del un, zialo ngal ah chun kuama'n Lalpa mu puan a"(Heb. 12:14) atia. Pathian biakna hi hawi tak leh fel tak ah i nei theina ding un eima kietchian masak akul hi. Insak inthangte tawh kicham a pawimaw a, midang tawh kichamlo ah Pathian biakna hin

umzia nei beklo ding ahi.

Awle Pathian i biaknau ahin eima kisukfel masakna ding hi tamtak um ding ahi. Biakna Thiangtho i nei theina ding un nisin i hindanteu sutthak zel a pawimaw a, ei ma bep dik kisakna chu Lalpa a ding a kidak um tak hikhathehi ahi. Zawlnei Isai in, "Zia

mite hin a kam un ei chawihawi un, a lungthim in vang ei gamlat ma mau hi" (Isai 29:13) ati hi eimau le kihikha thei ahi. Thugentu chun, Pathian In ah la chia phat leh la keng vengpha'n(Thugentu 5:1) ati gual ahin eimau chait kien thak zel hitiu.

--o0o--

## **PRESBYTERY SUNG THUCHUAM CHUAM – FEB. 21**

1. Date 5<sup>th</sup> January 2021 (Tuesday) ni'n KSP. Office bearer ten R & D, min in kochuam Upa damlote i) Upa Khaineithang, Kangvai leh ii) Upa Tualpau, Leilon vena nei in pauchap piakna leh natvena sum piak ahi.
2. Date 12<sup>th</sup> January 2021 (Tuesday 10.30 AM) in Khuga Sadar Presbytery Office Bearer te hiatpina'n KSP. Finance Officer a pawt Upa Liansawmthang @ Sawmpi leh a thak Upa Thienkhomang ten kikhutsanna a nei ui.
3. Date 12<sup>th</sup> January 2021 (Tuesday 12.30 PM) in Ms. Niangngai-chin @ Chinnu KSP Office ah 1989 - 2020, kum 31 sung ginum leh tawmngai tak ah a la sem chu a pension hun a tun taak ziak in Pawlpi sik in KSP Standing Committee ten thaakna nei ahi. Zia thaakna a hin luaitheina siam ahia, belsun khap-8 pia in, gratuity, leave salary sum leh a GPF account le piakdaw ngal ahi.
4. Khuga Sadar Presbytery Calendar – 2021 siam zo in kochuam tinte kiang ah kum 2020 statistic insuan kizik dan dungzui in hawpdaw ahi tai. Chuleh biakin a ding ah copy-2 (pani) chiat tawh piak khawm ahi. A man hi copy khat ah ₹.50/- (Fifty) hi ding

ahin, biakin a ding ah copy-2, (pani) kipe khawmte chu a man umlo ding ahi. Kochuamten diktak leh fel tak ah calendar – 2021 man hung sufel pai ding in ka hun chial hi.

5. KSP 63<sup>rd</sup> Annual Session thupukna dungzui in kum -2021 Piting leh NSSU Sunday School class Date 10<sup>th</sup> January 2021, Pathian ni a khan pat ahi ta, Piting thuzil – “Hebraite Lekhathawt” a hilchetna Rev. Siam Phaltual in a siam chu KSP office ah copy tamtak a um nalai ah kochuamten hung kilak sau sau ding in ka hun hiatsak hi. A man ₹. 50/- (Fifty) bep hi ding ahi. Chuleh NSSU zillai bu le office in a um a, a neiloten hung kilak zing thei ahi. NSSU zillai bu hi revision kibawl pet laitak ahia, tu kum sung a vaima thei lam pen ah zaw fel ding ah guanggal ahi.
6. Date 17<sup>th</sup> January 2021 Pathian ni khan KSP sung ah kochuam upa dawnte telna nei ahin, a nuai ah te hi a tel daw kochuam leh a teldawteu chu ahi:

**I. Leimakhong Mission Veng kochuam:**

- |                       |                     |
|-----------------------|---------------------|
| i) E/Upa Lalkhohen    | ii) E/Upa Pauneihau |
| iii) E/Upa Lamkholian |                     |

**II. Saipum kochuam ah:**

- |                      |                        |
|----------------------|------------------------|
| i) E/Upa Tinthianlal | ii) E/Upa Lamthianmang |
| iii) E/Upa Pauminlun |                        |

**III. Kharam Vaiphei Kochuam:** i) E/Upa Manglunlal

**IV. Zikpi Tampak Kochuam ah:** i) E/Upa Soithianmang

**V. Salem Kochuam ah:** i) E/Upa Lallianthang

**VI. Tuikham kochuam ah:** i) E/Upa Khaikhozam @ Zampu

7. Date 27<sup>th</sup> January 2021 (Wednesday 10.30 AM) in KSP. Office ah Receipt Clerk ding lakna a um a, written ah subject pathum-Maths, General knowledge leh English a zik ua, chuleh viva voice mi panga in mark pia in, candidates mi -12 te lak in mark mu sang pen Mr. Lalthianmung s/o, Thangkhothong leh Mrs. Niangkholian of Lingsiphai chu lak ahi tai. Date 1<sup>st</sup> February 2021 in Joining report a hun pia, 2<sup>nd</sup> Feb. 2021 in a sem pan tai.

Chun zia ni ma hin PMS.Tispari, chowkidar February- December 2021 sung ah pang ding lakna a um a, candidate mi panite lak in Mrs. Maya Kelki w/o, Kamal Kelki, Tispari chu lak ahi.

8. Kum 2021 sung a khan Pastorte leh upate Seminar a chuam gel ah nei ding ti guanggal himaleh Covid-19 natna hileng ziak in a la kibawl thei ta pua, zia chu tukum ah bawl ding ah thupuk zawm ahi dungzui in a hungtung ding date 18<sup>th</sup> February 2021 leh Office ah Pastorten nei ding a hui a, Upate chu March 2021 sung ah bawl ding ah phasak ahi.
9. Date 22<sup>nd</sup> January 2021 (Friday) ni khan KSP. Office ah Office Assistant Upa P. Siama in a zi Mrs. Kimboi tawh a kichennau kum 25 tinna silver Jubilee lawpna leh A zi Mrs. Kimboi, hun sawtak damlo ah um hung damdawna zal ah Pathian kiang ah kipak thugenna Damna maicham tawh kithua hun matna ding ah KSP a chialna dungzui in kipak etsakkan khiangkawi khat sil sak a hui a, chuleh a sepkhawmpi office stafften le memento kilawm tak a piau.
10. Date 23<sup>rd</sup> January 2021 zingkal dak 8.00 AM in KSP. Office bearer te leh M & E, Committee member te a thei thei chiakhawm in Cachhar mission field ah biakin sakna ding suangphum Upa Tinkholam, Moderator KSP in a nei hi.
11. Date 23<sup>rd</sup> January 2021 ni'n Kangvai Presbyterian Church KSP ah Central Khristian Khanglai Pawl (CKKP) Election leh Vaihawmna a um a, zia election Commissioner ding a chun KSP. Office Bearer te guat ahi dungzui in Upa Tinkholam, Moderator Rev. S.T.Kaia Vaiphei, Executive Secretary leh Rev. Seilunlal Secretary ten election a va neipi ua, zia zaw chun vaihawmna le nei ngal ahi. A nuai ah te hi kum 2021- 2023 sung ah CKKP vaipaw ding ah teldaw ah umte chu ahiu:
  - i) Leader : Pro. Pastor Pauneithang (KSP piak)
  - ii) Asst. Leader : Pa Lianboi, Kharam vaiphei
  - iii) Secretary : Mr. Lamsanglian, Tuibuang
  - iv) Asst. Secretary : Mr. Sonmuan, Tangmual

- v) Finance Secretary : Pa P.D. Minlal, Lingsiphai  
vi) Treasurer : Miss Ngairemi, Nghathal te a hiu.

12. A hung tung ding date 13<sup>th</sup>-14<sup>th</sup> February 2021 leh Lamka Chhim Presbyterian Church (TP) ah 44<sup>th</sup> Synod Annual Session um ding a hin, palai ding te chu Synod committee chuam chuam ah member te, Presbytery Moderator leh Secretary Sr. te, MPWF – 2, MPYF-2 te hi ding a hiu. Pathian in lem a ti chun zia hun tak hi leh Pro Pastor Pauneithang le pastor piting hi ding ah ordination hi ding ahi tai. Ordain ahi tak leh Khuga District enkawl ding ah District centre Kangvai ah um ding ahi.
13. Rev. Thanglianmang tu ah Khuga District bialtu pastor hi Synod Executive Secretary ding ah piak ahin, ama hi Pathian in lem a ti chun March 2021 a pat Synod lam ah um ding ahi tai.
14. Ahung tung ding date 12<sup>th</sup>-14<sup>th</sup> March 2021 sung in Saipum Presbyterian Church ah 18<sup>th</sup> Mission and Evangelism khawmpi um ding ahin, M & E, memberte leh kochuamte zia khawmpi mang ding in a la kisa chiat ding in zia “Damna AW” hi mang in KSP thasik in ka hun chial ahi.
15. Finance Committee, date 21<sup>st</sup> January 2021 chun Nov. 2020 - 10<sup>th</sup> January 2021 sung kochuam tin office lam ah sum piaklut dan etna a nei a, zia hun sung ahin Pathian gam, M & E, leh R & D, ah khatcha le lut khanailo ah nil (x) ah umte kiang ah thil umdan hiatsakna lekha piak ahin, bialtu pastorten a la kanzui ding ua mawpuakna piak ahi. Chun a sum tawm leh tam chu thu chuam hitaleh kochuam tinten thasin office lam ah lut ding dawlte fel tak ah hung pelut pai sek ding in zia “Damna Aw” mang hin I kihatsak in I kichial uh ahi.
16. Finance Committee, thupukna dungzui in Khuga Sadar Presbytery “Financial Rules” mumal tak nei ding ah phasak ahin, zia chu hun guanggal ding in Rev. S.T.Kaia Vaiphei, Executive Secretary leh Upa Thienkhomang, Finance Officer guat ahi. Zia chu hun guanggal in tin uh Finance Committee in a etdik nung tak leh Standing

ah puaklut ding ahi.

17. Date 28<sup>th</sup> January 2021 ni Sunday School Board Committee chun Piting leh NSSU Sunday School teachers' orientation nei ding chungchang genkhawm in District tinten a kin thei lam pen ah a la kibawl ding ua phasak ahin, zia ni chu leh a refreshment ding ua ₹. 5,000/ (Five thousand) chiat piak ding ah phasak ahi. Chuleh NSSU class kikhen dan kochuam tin ah hung kihawm chu kochuamten zui chiat ding in Sunday school board thasik in ka hun hiatsak ngal hi.
18. Date 28<sup>th</sup> January 2021 Education Board Committee chun kum – 2021 teachers' orientation nei ding chungchang genkhawm in February thasung ngei ah JCA, L.Champhai leh PMS. Tispari ah teacher te a ding in PMS. Tispari ah nei ding ah phasak ahi. Resource person ding in eimi educationist te mat ding ah phasak ahi. Tonglon 'D' school teacher orientation chu school inspector pa leh KKP office bearerte chia ah school campaign tawh kawp ah February thasung ah a vaima thei lam ah bawl ding ah phasak ahi.

## ‘DAMNA AW’ PHUNGVUKTUTE :

### PATRON MEMBERS :

1. Pu P. Vaiphei IAS, Imphal
2. Upa Henthianthang, S.Kotlian
3. T.Upa Haulallawm S.Kotlian
4. Upa Thienkhomang S. Kotlian
5. Upa Laltinkhup, HQ. Church, Tuibuang
6. Pi Manliankim, HQ. Church, Tuibuang
7. Upa D. Mina, Lingsiphai
8. T.Upa Ph. Gena, Lingsiphai
9. Pu. Khamlal Saipum
10. Pu Khamliankap Saipum
11. Pu. Tinlunlal Saipum
12. Pu. S.Kapbawi New Delhi
13. Upa Genhau Central Church, Compound veng
14. Pu. Khailianbawi Central Church, Compound veng
15. Pi Kimtawi Kohima
16. Tv. Daniel Tangmual

### MEMORIAL GIFT :

1. Pi Deem Melody, **Central Church, (Rengkai)**  
*[In loving memory of (L) Upa Lamthianlal]*
2. Pi Rebekah **Kangvai**  
*[In loving memory of (L) Pastor Khaivung]*
3. Upa Liansomthang **Lingsiphai**  
*[In loving memory of (L) Pu. Henzagen]*
4. Pi. Nem Grace Boisi Capvung **Delhi**  
*[In loving memory of (L) Pi Vanlalchhuangi]*

### SUPPORTING MEMBERS :

1. Upa Khomlunlal S.Kotlian,
2. Pu. S.Thangminlian Lingsiphai,
3. Pu Lelboi, Lingsiphai
4. T.Upa Lalneilian Central Church,
5. Pu EL Soson Central Church
6. T.Upa Genminthang, Central Church,
7. Pi. Kimneihawi Saipum
8. T.Upa J. Mark Saipum
9. Pu Genthiankap, Nghathal
10. Pu Lianzakhup Nghathal.
11. Pu Lemthang L. Mission Veng
12. Rev. S.T.Kaia Vaiphei Nghathal
13. Nk. Dimkhoniang Zikpi Tampak

**ENCOURAGING MEMBERS :**

- |                   |                 |
|-------------------|-----------------|
| 1. Pu K. Minlian  | Tangmual,       |
| 2. Upa Ph. Kamlam | L. Champhai,    |
| 3. Upa S.T.Siam,  | L. Mission Veng |
| 4. Pi Chhungi     | Hq. Tuibuang    |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

**(i). Patron member- Kum 3 (three) a ding in. ₹. 3,000/-**

**(ii). Memorial Gift- Kum 2(two) a ding in. ₹. 2,500/-**

**(iii). Supporting member- Kum2(two) a ding in ₹. 2,000/-**

**(iv). Encourager- Kum 1(one) a ding in. ₹. 1,000/-**

Chun, sum thawt nuamte a ding in:

**A/C name: Khuga Sadar Presbytery(MPCS)**

**A/C nos: 32483318505**

**Branch code: 6182, CCpur**

**CIF nos: 86412486695**

**IFSC nos: SBINOOO6182.**